



MAViC 2010 Suntik Semangat Nasionalisme Pelajar



Pelajar yang berjaya ke peringkat akhir bersama mock-up cek yang diterima.

SERDANG, 1 Jun – Universiti Putra Malaysia (UPM) menyuntik semangat nasionalisme terhadap pelajar dalam bentuk penerbitan video melalui Merdeka Award Video Competiton (MAViC) 2010.

Program yang bertujuan melahirkan golongan muda yang kreatif dan inovatif untuk memupuk nilai perpaduan dan 1Malaysia melalui bentuk penerbitan video itu dianjurkan oleh Sekretariat Anugerah Merdeka dan Jabatan Komunikasi, Fakulti Bahasa Moden dan Komunikasi (FBMK) UPM dengan kerjasama Perbadanan Kemajuan Filem Nasional Malaysia (FINAS) dan ASTRO.

Naib Canselor UPM, Prof. Datuk Dr. Nik Mustapha R. Abdullah berkata program itu menjadi medan kepada pelajar untuk menonjolkan diri dalam industri kreatif seperti bidang penulisan, perfileman dan muzik.

“MAViC menjadi medan kepada pelajar jurusan Komunikasi, Penyiaran, Perfileman dan Multimedia untuk menghasilkan karya bermutu tinggi dengan menginspirasi erti kemerdekaan dari perspektif mereka sendiri,” katanya.

Daripada 150 penyertaan pelajar Institusi Pengajian Tinggi Awam dan Swasta, 80 penyertaan telah terpilih untuk dinilai karyanya mengikut tema MAViC iaitu ‘Aku Dan Merdeka’ pada 29 Mei lalu.



Prof. Madya Dr. Che Ibrahim (kanan) menyampaikan cek kepada Mohd Shakreen sambil diperhatikan oleh Dr. Megat Al-Imran Yasin (kiri).

Walau bagaimanapun, hanya lima karya pelajar berjaya ke peringkat akhir bagi kategori Pengumuman Khidmat Awam (PSA) dengan menerima cek bernilai RM3,000 dan lima lagi

bagi kategori Video Pendek dengan cek bernilai RM5,000 pada majlis sidang Media Penyerahan Cek di sini bagi menampung kos penggambaran yang bermula pada 1 Jun sehingga 16 Julai depan.

Sementara itu, dua Pelajar Bacelor Komunikasi FBMK yang berjaya ke peringkat akhir ialah Nur Hakimah Izzati Jaapar bagi kategori Video Pendek bertajuk 'Titis-Titis Kealpaan' dan Mohd Shakreen Razali bagi kategori PSA yang bertajuk "Lain-Lain".

Nur Hakimah berkata dia akan membuat karya video yang terbaik agar dapat memberikan impak kepada masyarakat tentang erti kemerdekaan terutama kepada remaja.

"MAViC yang julung kali diadakan dapat menerapkan semangat patriotik terhadap masyarakat terutama remaja," katanya.

Sementara itu, Mohd Shakreen berharap melalui MAViC, masyarakat dapat melihat pelajar UPM mempunyai kualiti yang tinggi dalam bidang kreatif.



Datuk Khalid Mohd (tiga dari kiri) menyampaikan cek kepada Nur Hakimah (dua dari kanan).

"Selain dapat mencungkil bakat muda dalam industri kreatif, MAViC juga dapat mempamerkan kualiti pelajar UPM kepada masyarakat," katanya.

Berita ini disediakan oleh Seksyen Media, Bahagian Komunikasi Korporat UPM. (Noralis Buang 'wartawan pelatih' 03-89466014).